

ET ACCORDS

FAITS ENTRE MON-

SEIGNEUR LE DVC D'ANIOV

& d'Alençon, Fils & frere de Roy:

Avec les Prelats, Nobles &

deputez des villes repre-

sentans les Estats

generaux des

pays bas.

*Avec la copie des lettres de Mon-
seigneur le Duc.*

A PARIS,

Pour Iean Coquerel Libraire, rue S. Jacques, pres

les Iesuites, suyuant la copie Imprimee

à Rouen, par Thomas Mallard,

avec Priuilege.

1 5 7 9.

1895



ALLIANCES ET ACCORDS

FAITS ENTRE LE SEIGNEUR MAR-
quis de Reynel, Baron de Busi & de Saxefontaines,
Capitaine de cinquante hommes d'armes des ordon-
nances du Roy tres-chrestien, Gouverneur & Lieute-
nant general des pays & Duché d'Anjou, & Co-
lonnel general de l'Infanterie Françoisse de Monsei-
gneur le Duc, representant la personne dudit Seigneur
Duc: accompagné de Messieurs de la Neuf-uille & de
Mondoucet, Conseillers & Chambellans ordinaires
des affaires & conseil dudit Seigneur Duc, selon la
commission emanee de son Alteze du xxij. de Iuillet
dernier d'une part: & les Prelats, Nobles & depu-
tez des villes, representans les Estats generaux des
pays bas, d'autre: sous la forme, maniere & condi-
tion comme s'ensuit.

I



REMIEREMENT, Monsei-
gneur le Duc d'Anjou assistera
mesdits Seigneurs des Estats de
ses forces & moyés pour leur de-
liurance de la tyrannie insuppor-
table des Espagnols, de l'inique
inuation de Don Iean & ses adherens.

I I.

A scauoir en entretenant à l'assistance de ceste

guerre, dix mille hommes de pied, & deux mille chevaux payez & soldoyez à ses fraiz l'espace de trois mois routiers & cōtinuelz: Bien entendu que pour les grands fraiz & despeses que desia il a eu, à l'occasiō de cestedite guerre par diuerſes leuees, & pour le regard du precōpte desdits fraiz, le premier mois luy sera desia alloué, pour tout ce mois d'Aouſt courant, tout ainſi comme s'il eust aſſiſté leſdits Eſtats du nōbre fuſdit des gēs de guerre: Et cōmencera on à compter les deux autres mois enſuyuans pour fournir audit tēps des trois mois fuſdits, dès le premier iour du mois de Septēbre prochainemēt venāt. Pourueu toutesſois, & en cas que toutes les forces dudit Seignr Duc iuſques au nōbre fuſdit ſoient lors pour ledit premier iour de Septembre arriuez dedās le pays, & preſts pour faire ſeruiſe, autrement cōmenceront leſdits deux mois dès le iour de leur arriuement, pour compter enſuyuamment iuſques à l'expiration desdits deux mois, deſquels pour la raiſon fuſdits, leſdits Eſtats ſe contenteront au regard du parſourniſſemēt des trois mois deſſus mentionnez. I I I.

Et en cas que ledit tēps paſſé la fuſdite guerre ne ſoit encōres acheuée ledit Seigneur Duc cōtinuera ſon aſſiſtence & ſecours en nombre de trois mil hōmes de pied, & cinq cens chevaux auſſi à ſa ſoulde, à employer tant pour la garniſon des places qu'on luy baillera, qu'ailleurs, pour le bien desdits Eſtats: I I I I.

Et là deſſus ont leſdits Eſtats accordé, & accordent audit Seigneur Duc le tiltre de *Deſenſeur de la*

liberté des pays bas contre la tyrannie des Espagnolz, & leurs adherans: & comme tel le feront declarer & publier par tout le pays, à fin que par là il apparoiſſe de la legitime occaſion qu'il a de les ſecourir.

v.

Et comme pour l'aſſurance de l'une & de l'autre partie, contre les ennemis communs, qui par cy apres ſe pourroient formalifer, ou contre luy, ou contre leſdits Eſtats, pour le regard de ceſte entreprinſe & reſolution, & auſſi pour entretenir & augmenter la bõne correfpondance & amitié qu'il à pleu à la Sereniſſime Royne d'Angleterre maintenir avec eux, a eſté trouué tres-expedient & neceſſaire, que ledit Seigneur Duc avec leſdits Eſtats moyèneront deuers icelle, qu'il plaiſe à ſadite Maieſté, d'entrer avec eux en vne bonne, ferme, & indiffoluble alliance, pour le bien & vtilité commune de ces pays, dudit Seigneur Duc, & deſdits Eſtats, y conioingnant auſſi le Roy de Nauarre & ſes confederez, & monsieur le Duc Caſimire, Cõte Palatin, enſemble tous autres Princes, Potentats, Republicques & villes qui le deſireront, & que par commun aduis l'on trouuera conuenir ſur les conditions & articles, que pour la meilleure ſeureté des allies & confederez, l'on pourra cy apres par enſemble conclure & accorder.

Mais d'autant que monsieur de Buſſy & autres deputes dudit Seigneur Duc, declarent n'auoir aucun pouuoir de ce faire, ſera ledit Seigneur de Buſſy requis qu'il vueille faire tout deuoir vers ledit Seigneur Duc, à ce que le concept de alliance puiſſe eſtre effectué: Bien entendu,

A iij

qu'elle ne seruira aucunement pour inuahir quelques autres qui ne seront ennemis de ladite alliance. Et mondit Seigneur Duc n'entreprendra guerre contre ladite Royne d'Angleterre, ne souffrira, autant que luy sera possible qu'il luy en soit fait.

VI.

Et s'obligeront lesdits Estats pareillement vers iceluy Seigneur Duc, d'entretenir avec luy vne perpetuelle association, & alliance: & ceste guerre estant finie, l'assister contre tous & enuers tous, qui le voudront assaillir, avec le nombre de dix mil hommes de pied & deux mil cheuaux, payez & soldoyez à leurs despés l'espace de trois mois, & iceux eziperez, & que la guerre ne fust finie, serôt tenus de luy continuer le secours en nōbre de trois mil piétons & cinq cens cheuaux. Excepté tant seulemēt l'Empire, les Royaumes d'Angleterre, & d'Escosse, & autres alliéz & confederez desdits Estats, si comme les Roys de Dannemarque, & de Zvvede les vijles de Haïes, les Princes Electeurs, & le Duc de Cleues. Et si ledit Seigneur Duc d'Anjou veut entreprendre quelque guerre, lesdits Estats l'assisteront des forces susdites en cas qu'icelle guerre se face par leur aduis selon les priuileges du pays.

VII.

Bien entendu que ledit Seigneur Duc n'entreprendra nulle guerre pour le fait & à cause de la Religion ou autrement: Auquel cas lesdits Estats ne seront tenus de luy prester aucune ayde ou secours. Et ce pendant durant le secours dudit Seigneur Duc cy dessus mentionné, accordent lesdits Estats qu'en toutes expéditions de guerre es-

tant son armee ioincte par commun auis , avec la leur, & ledit Seigneur Duc y estant en personne, sera nommé le premier, & y commandera comme Defenseur de la liberté du pays bas , conioinctement avec lesdits Estats representez par leur general. Et n'y estant ledit Seigneur Duc en personne, commandera ledit general des Estats seul.

V I I I.

Mais entant que concerne le fait de la police & du gouuernement du païs, sera ledit seigneur Duc content de ne s'y entremettre , ains en demeurera l'entiere maniance , & conduite ausdits Seigneurs Estats, & ceux qui par lesdits Estats à ce sont ou seront commis, ou ordōnez, si comme Monseigneur l'Archiduc & ceux du conseil d'Estat: Bien entendu toutesfois que les depeschés qui partiront vers ledit Seigneur Duc, se feront de la part desdits Seigneurs Estats, & du cōseil d'Estat, & ce par forme d'aduís & requisitiō: & au reste le present gouuernement demeurera en l'estat & disposition entierement, comme il est à present.

I X.

Et comme ainsi soit que tous traitez particuliers ne peuuent sinon engendrer matieres de deffiance & diminution de mutuelle sincerité & rondeur: ledit seigneur Duc promet qu'il ne fera nuls traitez, capitulations, accords, ny dressera intelligence en particulier avec aucunes villes, prouinces, ou personnes particulieres de par-deça, sans le sceu, consentement & aggregation desdits Estats en general: Comme pareillement lesdits seigneurs Estats prometteront de ne faire nul traité , capitulation,

accord ny dresser intelligence, en particulier, avec aucune ville, prouince où personne particuliere de par deça qui pourront estre en preiudice dudit seigneur Duc ou de ce present traité.

X.

Et en outre promettent & s'obligent qu'en cas que par cy apres ils voussissent prendre vn autre Prince, ils le prefereront à tous autres souz les conditions que lors luy seront proposees.

X I.

Et à l'effet que dessus, s'assembleront les Estats generaux en dedans trois mois apres la guerre finie, & plustost, si faire se peut, pour en resouldre.

X I I.

Et pour l'assurance dudit seigneur Duc, lesdits Estats sont contens de luy mettre es mains les villes cy deuant promises pour sa seureté, sa retraite & racommodement c'es blesez & malades: Ascauoir: Quésnoy, Landrechies & Bauais: Bien entendu que si ledit seigneur Duc peut prendre sur l'ennemy vne de ces villes Marienbourg, Philippeville ou Brinch, elle luy sera baillée en eschange de Bauais à son choix & option.

X I I I.

Pour faire deliurer lesdites villes audit seigneur Duc, seront depeschées lettres tant à icelles villes qu'au seigneur Conte de Lalain, Gouverneur de Haynault, & aux Gouverneurs particuliers d'icelles villes par lesdits Estats, & par le conseil d'estat, à la fin susdite, leur remonstrant que c'est pour le bien & seureté generale du païs, & la leur en particulier. Et en cas de refus, lesdits Estats & conseil d'estat

d'estat, decerneront cōmandement plus estroit avec protestation contr'eux de tout le mal qui en pourra aduenir, & feront tout autre deuoir possible tant enuers ledit Seigneur Conte de Lalaing que autres, à fin que soit accomplie l'assurance desdites villes.

XIIII.

En outre toutes villes, places & forteresses situes par delà la Meuze, & lesquelles ne sont à present ou n'ont esté vnies, & coniointes en l'association des Estats depuis la Pacification de Gand, si comme Bourgoingne & Luxembourg, qui se prendront par armes dudit Seigneur Duc, soit seules ou accompaignees des forces ou armes desdits Estats, demeureront souz la puissance, commandement & obeissance dudit Seigneur Duc sa vie durant, & apres son trespas succederont & heriteront lesdites villes conquestees & celles qu'il receura pour son assurance, à ses enfans masculins procreez de legitime mariage. Mais n'heriteront ny ne succederont à autres quelconques hoirs ou ayant cause, dequoy seront données toutes seurerez des lettres & obligations necessaires en bonne & deuë forme.

XV.

Mais quant aux villes, places & forteresses qui ont esté vnies avec lesdits Estats depuis ladite Pacification de Gand, icelles demeureront ausdits Estats en cas qu'icelles puissent estre recouurees en quelque façon que ce soit.

XVI.

Et quant aux villes & places aussi non associées

en la façon susdite qui se rendront de leur gré & sans estre forcées par armes ou sieges, si comme par intelligence ou composition, sont contens lesdits Estats que ledit Seigneur Duc participe à la moitié de la conquête d'icelles.

XVII.

Acceptans neantmoins l'offre que en remboursant par lesdits Seigneurs Estats les fraiz & entretenemés des gens de guerre, faits par ledit Seigneur Duc pour la generale defence de la patrie, lesdites villes promises en assurance leur seront rendues.

XVIII.

Acceptans aussi lesdits Seigneurs Estats les offres & presentations que ledit Seigneur Duc leur a faictes de se declarer comme desia il a esté déclaré par les effets, ennemy de Don Iean & ses adherés, cōme aussi ils acceptent l'ampliation d'iceluy article, d'estre ennemy de tous ceux que les Estats de ce païs tiendront & reputeront pour ennemis, & principalemēt des Espagnols & leurs adherens & partisans dont se fera imprimer acte publicque & solennel en la forme que lesdits Estats aduiseront.

XIX.

Dauantage que ledit Seigneur Duc ne menera par deça nuls estrangiers gens de guerre autres que François naturels & iceux en nombre predict, sauf la garde ordinaire de Suysses, qui est du corps de sa maison: & si autrement il en fust requis par lesdits Estats.

XX.

Que ledit Seigneur Duc empeschera par toutes voyes à luy possibles que nulles troupes François-

ses ny autres viennent au secours des Espagnolz, comme aussi empeschera tout autre renfort & assistance qui se puisse faire aux ennemis, tant que possible luy fera.

XXI.

Item que les troupes qui par ledit Seigneur Duc seront enuoyees au secours desdits Estats, seront enuoyees & employees par cōmun aduis, au plus-grand bien & seureté du pays, Remercians tresaf-fectueusement le dit Seigneur Duc des actes d'ho-stilité que desia il a monsté contre lesdits ennemis: Bien entendu que ny ledit Seigneur Duc, ny les-dits seigneurs Estats ne pourront respectiuelement traiter aucune paix ou amitié avec le Roy d'Espa-gne, & autres dessus mentionnez sans le scē, con-sentement & aggregation l'un de l'autre: Moyenant que durant l'espace de tout ce mois d'Aoust qui court, en cas que lesdits seigneurs Estats puissent arrester avec Don Iean conditions d'une paix as-seuree & bonne, avec l'effectuation d'icelles à leur contentement, lesquelles ne soyent en preiudice dudit seigneur Duc, ny de ses seruiteurs, allies & confederez, Ils ayent liberté & puissance d'y enté-dre & de les conclure & arrester, moyennant que durant cedit mois d'Aoust, ledit don Iean remette les villes de Limbourg, Ruremunde & Deuenter, ensemble toutes les villes sises deça la Meuze, es mains desdits seigneurs Estats, pourueu qu'en ice-luy traité soit cōprins ledit Seigneur Duc & tous ceux qui en ceste presente expedition & entremise luy auroit serui & assisté. Comme aussi tous autres Princes & potentats y seront comprins, qui auront

donné assistance, & secours ausdits seigneurs Estats en ceste presente guerre, si comme la Serenissime Royne d'Angleterre, le Duc Iean Casimire, Côte Palatin, & autres.

XXII.

Et à condition que si par cy apres on faisoit la guerre audit seigneur Duc en respect & pour cause du secours qu'il à voulu prester ou a presté ausdits Estats: ils seront tenus de luy assister, & le secourir de leurs forces & moyens, suyuant l'article cy dessus specifié sur ceste matiere. Et dauantage, que ce faisant la paix au terme susdit, ils recognoistront le benefice d'icelle paix (apres Dieu) de la main dudit seigneur Duc, & luy feront rembourser tous les frais & despens que pour ledit secours il aura faits & frayez. Et en outre luy feront encores vne recognoissance condigne à sa grandeur. Et que ce pendant que lon traitera la paix, & durant le terme susdit tous les autres poincts, & articles cy dessus mentionnez demeureront en plaine vigueur & force, & s'exécuteront promptement, & ne laissera on de faire tous actes de hostilité.

XXIII.

En outre acceptent lesdits Estats la presentation & offre que ledit seigneur Duc leur fait, concernât la conseruation des villes que luy seront mises en main, en telle forme que les habitans auront occasion de s'en contenter, & avec si bonne discipline que les voisins en puissent prendre exemple, entretenant leurs priuileges, droits & libertez anciènes: Et les rendât en tout tel estat de forteresses & munitions qu'il les aura receus, sauf si elles estoient af-

saillies & violentes par l'ennemy, dont ledit seigneur Duc leur en donnera assurance.

Fait & arresté en l'assemblée des Estats generaux, le
treziesme iour d'Aoust mil cinq cens soixante & dixhuit.

Signé,

I. Houfflin.

Nous Loys d'Amboise, Marquis de Reynel, Baron de Bussy, &c. Capitaine de cinquante hommes d'armes des ordonnances du Roy treschrestien, Gouverneur & Lieutenant general és pays & Duché d'Anjou, premier gentilhomme de la chābre de Monseigneur & Colonel general de l'infanterie Françoise de son Altez.e. accōpagné des Seigneurs de la Neuville & de Mondoucet, Conseillers & Chambellans ordinaires des affaires & conseil de mondit Seigneur Duc: Ayans geré, traité, & negocié avec Messieurs les Estats generaux du pays bas, en vertu du pouvoir & commission à nous donnée par mondit Seigneur. Promettous sur nostre honneur, corps & biens de en dedans huit iours faire tenir ausdits Seigneurs Estats le present traité d'être lesdits Seigneurs Estats, & nous arresté, signé, ratifié & approuvé de mōdit Seigneur Duc. Fait en Enuers le xij. iour d'Aoust, mil cinq cens soixante & dixhuit.

Signé,

Loys d'Amboise.

Loys de Hacquenille, &

Claude de Mondoucet.

Nous François fils de France, frere unique du Roy,
Duc d'Anjou, Alençon, Touraine, & Berry,
&c. Certifions auoir veu & entendu le present
traicté, que nous auons fait lire en nostre conseil, conclud
& arresté en nostre nom entre le Seigneur de Busi, pre-
mier gentilhomme de nostre Châbre, accompagné des Sei-
gneurs de la Neuf-uille & de Moducet, noz Conseillers,
Chambellans ordinaires de nos affaires & conseil, d'une
part: & les Prelats, Nobles, villes & communautéz des
Estats generaux des pays bas, d'autre, duquel nous nous
tenons contens: Et en tesmoin de cel' auons approuué, rati-
fié, & signé de nostre propre main. A Mons. le vingties-
me iour d'Aoust, mil cinq cens soixante dixhuit.

sgné,

François.

Et plus bas,

Denoirs.

Copie des lettres de Monsieur.

Nous François, fils de France, frere unique du Roy,
Duc d'Anjou, Alençon, Touraine, Berry, Eureux
& Ianthiery: Contre du Mayne, du Perche, de Montfort.
Dreux Mante & Meulan, & Meaux, &c. A tous ceux qui
ces presentes verrôt, Comme tous Princes magnanimes,
& vertueux soient de droit diuin & humain obligez à
maintenir la iuste cause des affligez, les defendre de tou-
tes iniures, oppressions & outrages avecques tels moyens
que Dieu leur a mis en main, & qu'ayant ample cognoi-
sance de combien iniquement Don Iean d'Austriche, sa
supte & adheaus oppressent de dure & cruelle guerre le
pauvre peuple de ces pays bas, leur voulant imposer le
ioug d'une trop inique & barbare seruitude: Et mesmes
pour effectuer ce qu'auons entre autres promis par les
articles faits & cōceuz entre nous & les Estats generaux
desdits pays bas, sur l'acceptation de nostre personne au-

titre de Defenseur de la liberté d'iceux pays contre la tyrannie des Espagnols & leurs adheras en ce que touche la declaration d'estre ennemy d'iceux : Scauoir faisons, que, en cōsideration des choses susdites, nous nous declarons par ceste ennemy dudit Don Iean d'Austriche & sesdits adherans, principalement desdits Espagnols & leurs partisans, ensemble de tous ceux que lesdits Estats tiennent & tiendront pour ennemis, selon & aux conditions portees par le traitté fait entre nous & lesdits Estats, leur denonçant par la presente toute guerre ouverte, & que les poursuurors & traiterons pour tels par voyes d'armes & autrement, par tout où les pourrons trouuer. Auquel effet & mesmes afin que chacun en soit aduerty, nous consentons que ce present acte soit imprimé & publié par tout cedit pays bas, afin qu'il apparaisse de la legitime occasion qu'auons de secourir lesdits Estats. En tesmoin dequoy auons signé ces presentes de nostre propre nom, & fait cacheter du seel de noz armes Dōné à Mons le neufiesme iour de Septembre, l'an mil cinq cens soixante dixhuiet.

Signé,

François.

Et plus bas.

Du Mesnil.

Et cacheté du cachet dudit Duc d'Alençon.

Copie des lettres de Monsieur.

Nous François Fils de France, frere vnique du Roy, Duc d'Anjou, Alençon, Touraine, Berry, Eureux, & Lantherry: Conte du Mayne, du Perche, de Mōtfort, Dreux, Mante, & Meulan, & Meaux, &c. A tous ceux qui ces presentes lettres verront, Comme les Estats generaux des pays bas, pour l'asseurance de ce qu'ils ont entre autres contracté avec nous, endroit la denominatiou de nostre personne, au titre de Defenseur de la liberté d'iceux pays, aux conditions portees par le cōtract, sont esté contés de nous mettre entre mains, pour nostre seurété, retraite, & accommodemēt des blesez & malades,

les villes de Quesnoy, Landreschies & Bauais: Bien entendu, que si nous puissions prendre sur l'ennemy l'une des villes, à scauoir de Mariembourg, Philippeulle ou Binch, l'une desquelles nous seroit baillee en eschange de Bauais susdit, à nostre choix & option. Et pour satisfaire de nostre part à ce qu'auons promis ausdits Estats, en acceptât l'offie d'iceux en cest endroit, il leur en conuient donner assurance pertinente: Pource est-il ce considéré auons promis, & promettons en bonne foy, & parole de Prince ausdits Estats des pays bas, que pour la conseruation des villes susdites, qu'ils sont contents mettre en noz mains comme dir est, que tiendrons les habitants d'icelles en telle forme, qu'ils auront occasion de se contenter, & avec si bonne discipline, que les voisins en pourrôt prendre exemple, entretenât leur ressort, droits, priuileges & libertez anciens, & les rendant en tout tel estat de forteresses & munitions (sauf si elles estoient assaillies & violentees par l'ennemy,) que les aurions receues. Et ce en cas de remboursement de tous frais, & despeses que pour le secours des pays bas, aurions fait: le tout selon & au desir du contenu audit traité. Promettons en outre qu'ausdites villes ne succederont ny heriteront, si non noz enfans mâles, procreez de legitime mariage, à l'exclusion de tous autres hoirs ou ayâns cause: Auquel effect renouons pour nous & pour noz hoirs non mâles procreez audit mariage, dès maintenant, pour lors au proufit des Estats generaux: Et signâment de la prouince de Haynault, dont de tout ce que dessus leur en donnons toute assurance. En tesmoin dequoy nous auons signé cestes de nostre main propre, & icelles fait cacheter du seel de noz armes.

Donné à Mons, ce neufiesme iour de Septembre, l'an mil cinq cens soixante & dixhuit.

Signé,

François.

Et plus bas,

Du Mesnil.

Et cacheté du cachet dudit Duc.